



Sumáriu Kazu

Juñu 2013

Sumáriu prosesu julgamentu kazu iha Tribunál Distritál Baucau

Introdusaun

Iha Juñu 2013, JSMP monitoriza prosesu julgamentu kazu iha Tribunál Distritál Baucau hamutuk 14. Husi total kazu 14 ne'e klasifika ba kazu krime ho natureza violénsia doméstika 6, kazu krime ofensa ba integridade fízika simples 2, kazu krime ofensa ba integridade fízika grave 1, kazu furtu agravadu 1, kazu inséndu 1, kazu ameasa 1, kazu propaganda ilísita eleitorál 1 no kazu tentativa víolasau 1.

Kazu hirak ne'e iha kazu 7 mak hetan ona desizaun, kazu 5 mak sei kontinua julgamentu no kazu 2 adia tanbá parte sira la kumpri notifikasaun. Kazu 7 ne'ebé konklui ona nia prosesu termina ho maioria pena prizaun maibé suspendidu, pena prizaun ba ofensa ba integridade fizika no pena multa ba kazu rua.

Asuntu interesante ne'ebé halo JSMP kontinua preokupa no kestiona mak iha ligasaun ho kazu ofensa ba integridade fizika simples ne'ebé julga ho Númeru Prosesu: 157/Crm.S/2012/TDB.

Iha akuzasaun Ministériu Públiku haktuir katak arguidu aleinde halo ofensa ba vítima, arguidu mos uja tudik hodi halo kanek vítima nia ulun. JSMP sempre preokupa tanba wainhira arguidu uja material/instrumentu ne'ebé iha potencia atu hakanek ka ameasa vítima nia vida la'os ofensa ne'ebé simples. Tudik nu'udar instrumentu ida ne'ebé iha kbiit atu halakon vítima nia vida. Mesmu nune'e, Ministériu Públiku akuza deit ho ofensa ba integridade fizika simples. Ministériu Públiku mos akuza katak aktu ne'e akontese bebeik ona, maibé Ministériu Públiku la akuza ho maus-tratus ba konjuje, maibé prefere liu ofensa ba integridade simples.

JSMP hein katak ba futuru Ministériu Públiku no tribunál bele apresia profundamente elementu krime ne'ebé asosiadu ho krime ne'ebé arguidu komete.

Tuir mai sumáriu julgamentu kazu kompletu:

1. Kazu krime ofensa ba integridade fízika simples-Nú. 176/Crm.S/2012/TDB

Kompozisaun tribunál : Singulár
Juis : Dr. José Gonçalves
Ministériu Públiku : Dr. Pascasio de Rosa Alves

Defeza : Dr. Sérgio Paulo Dias Quintas
Konkluzau : Omóloga

Iha 11 Juñu 2013 Tribunál Distritál Baucau hala'o tentativa konsiliaun ba kazu ofensa ba integridade fízika simples ne'ebé involve husi arguidu José de Araújo hasoru vítima Beatris Amaral. Kazu ne'e akontese iha 01 Outobru 2012, iha Distritu Viqueque.

Iha julgamentu ne'e, tribunál omóloga kazu refere tanba entre arguidu no vítima halo ona akordu dame malu atraves husi família. Hafoin omóloga kazu ne'e tribunál taka ona prosesu no absolve arguidu husi kazu ne'e.

2. Kazu krime ofensa ba integridade fízika simples ho Nú. 197/Crm.S/2012/TDB

Kompozisaun tribunál : Singulár
Juis : Dr. José Gonçalves
Ministériu Públiku : Dr. Pascasio de Rosa Alves
Defeza : Dr. Sérgio Paulo Dias Quintas
Konkluzau : Kondena ba prizaun fulan 5, maibé suspende ba tinan 1

Iha 11 Juñu 2013, Tribunál Distritál Baucau julga arguidu kazu ofensa ba integridade fízika simples ho natureza violénsia doméstika ne'ebé involve husi arguidu DA hasoru nia fen CC. Kazu ne'e akontese iha 18 Marsu 2011, iha Distritu Baucau.

Ministériu Públiku akuza katak iha 18 Marsu 2011, arguidu no vítima deskuti malu atu ba vota, arguidu nervozu foti ai-pedasuk ida baku iha vítima nia kanotak, aperta vítima nia kakorok, tebe dala rua iha vítima nia kotuk laran, rasta vítima nia liman no dudu monu ba iha rai. Aktu ne'e kauza vítima sofre kanek iha ulun, bubu no moras iha parte kakorok no kotuk laran.

Ministériu Públiku akuza arguidu kontra artigu 145 Kódigu Penál kona-ba krime ofensa ba integridade fízika simples konjuga ho artigu 35 Lei Kontra Violénsia Doméstika.

Iha audiénsia julgamentu arguidu konfesa faktus totalmente, arrepende no deklara katak sei la halo tan krime ne'e hasoru nia fen ka ema seluk iha futuru.

Bazeia ba faktu no sirkunstansia atenuantes hirak ne'e, nune'e iha 18 Juñu 2013 Tribunál deside hodi kondena arguidu ho pena prizaun fulan 5 maibéé suspende ba tinan 1.

3. Kazu krime ofensa ba integridade fízika simples-Nú. 157/Crm.S/2012/TDB

Kompozisaun tribunál : Singulár
Juis : Dr. José Gonçalves
Ministériu Públiku : Dr. Pascasio de Rosa Alves
Defeza : Dr. Rui Manuel Guterres

Konkluzauun : Kondena ho pena prizaun fulan 7 maibé suspende ba tinan 1 fulan 6

Iha 11 Juñu 2013 Tribunál Distritál Baucau hala'o audiénsia julgamentu ba kazu krime ofensa ba integridade fízika simples ho natureza violénsia doméstika ne'ebé involve husi arguidu VS hasoru nia fen FE. Kazu ne'e akontese iha 10 Abril 2012 iha Venilale, Distritu Baucau.

Audiénsia julgamentu hahu ho lee akuzasaun. Ministériu Públiku akuza katak iha 10 Abril 2012, arguidu no vítima diskuti malu tanbá atu fó han sira nia oan. Derepentí arguidu foti ai pedasuk ida baku ba iha vítima nia ulun, tuku dala barak iha isin lolon no matan fukun. Tanbá tauk, vítima halai ba hela iha nia inan-aman nia uma maibé arguidu tuir vítima no hodi tudik ida sona iha vítima nia ulun too hetan kanek. Aktu ne'e rezulta vítima nia ulun no ain kanek, bubu no moras iha matan fukun no isin loloon tomak.

Ministériu Públiku mos akuza katak durante ne'e arguidu sempre komete bebeik ona krime hanesan hasoru vítima, maibé vítima la halo denúnsia.

Durante julgamentu, arguidu konfesa totalmente faktus ne'ebé Ministériu Públiku duun ba nia no arepende nia hahalok. Arguidu deklara tan katak sira rezolve ona kazu ne'e iha sira nia família.

Depoisde rona tiha deklarasaun husi arguidu, tribunál kontinua ho alegasaun finál.

Iha Ministériu Públiku nia alegasaun finál husu ba tribunál atu aplika pena prizaun tinan 1 fulan 6 no suspende ba tinan 1 fulan 6. Alegasaun ne'e bazeia faktu antenuantes sira hanesan arguidu konfesa, arrepende, dame malu ona ho vítima no arguidu nu'udar responsável ba família.

Defeza husu ba tribunál atu konsidera sirkunstânsia atenuante jerál no husu atu fó pena ne'ebé kmaan ba arguidu.

Kazu ne'e konklui iha 18 Juñu 2013, no tribunál kondena arguidu ho pena prizaun fulan 7 no suspende ba iha tinan 1 fulan 6.

4. Kazu krime ofensa ba integridade fízika grave -Nú. 39/Crm.C/2011/TDB

Kompozisaun tribunál	: Koletivu
Juis	: Dra. Ângela Faria Belo, Dr. Afonso Carmona no Dr. José Gonçalves
Ministériu Públiku	: Dr. Aderito Tilman no Dr. Pasasio de Rosa Alves
Defeza	: Dr. Marito da Costa Saldanha (advogadu privadu)
Konkluzauun	: Kondena ho pena prizaun no indemnizasaun sivíl

Iha 11 Juñu 2013, Tribunál Distritál Baucau kontinua hala'o audiénsia julgamentu ho agenda apresenta alegasaun final ba kazu krime ofensa ba integridade fízika grave. Kazu ne'e involve arguidu Pedro dos Santos hasoru vítima Ângela da Silva ne'ebé akontese iha 01 Janeiro 2011 iha Com-Lautem.

Iha alegasaun finál, Ministériu Públiku husu ba tribunál atu kondena arguidu ho pena prizaun tinan 5 fulan 6 tanbá konsidera faktus hotu-hotu provadu.

Iha parte seluk defeza husu ba tribunál atu absolve arguidu husi kazu ne'e tanbá arguidu komete krime ne'e hanesan forma auto defeza ida hodi defende nia aan no atu defende nia alin sira. Depois rona tiha alegasaun, tribunál marka ba iha 26 Juñu 2013 hodi rona leitura akordaun.

Tribunál konklui prosesu ne'e iha 26 Juñu 2013 no kondena arguidu ho pena prizaun tinan 3 fulan 6 inklui selu indemnizasaun sivíl ba vítima hamutuk \$500.00.

5. Kazu krime tentativa violasaun seksuál Nú. 160/Crm.C/2012/TDB

Kompozisaun tribunál: Koletivu

Juis : Dra Ângela Faria Belo, Dr. José Gonçalves no Dr. Afonso Carmona

Ministériu Públiku : Dr. Baltazar Ramos

Defeza : Dr. Rui Manuel Guterres

Konkluzau : Adia ba 28 Juñu 2013 hodi rona leitura akordaun

Iha 12 Juñu 2013 Tribunál Distritál Baucau hala'o julgamentu ba kazu krime tentativa violasaun seksuál ne'ebé involve arguidu AC hasoru vítima NCB. Kazu ne'e akontese iha 18 Setembru 2011, iha Distritu Baucau.

Julgamentu ne'e ho agenda rona deklarasaun arguidu, depoimentu vítima no testemuña. Tanba natureza husi kazu ne'e julgamentu taka ba públiku no JSMP la admite atu observa julgamentu ba kazu ne'e.

Tuir informasaun ne'ebé JSMP asesu husi ofisial justisa informa katak tribunal marka fali orariu ba 28 Juñu 2013, maisoumenuz iha tuku 14:00 hodi rona leitura akordaun.

6. Kazu krime ofensa ba integridade fízika simples ho Nú. 59/Crm.S/2012/TDB

Kompozisaun tribunál: Singulár

Juis : Dr. José Gonçalves

Ministériu Públiku : Dr. Pascasio de Rosa Alves

Defeza : Dr. Rui Manuel Guterres

Konkluzau : kondena ho pena multa US\$ 90.00

Iha 12 Juñu 2013 Tribunál Distritál Baucau lee leitura sentensa ba arguidu EM ne'ebé komete krime ofensa ba integridade fízika simples ho natureza violénsia doméstika hasoru nia fen TS. Kazu ne'e akontese iha 03 Agostu 2011 iha Viqueque.

Ministériu Públiku akuza arguidu kontra artigu 145 Kódigu Penál kona-ba ofensa ba integridade fízika simples konjuga ho artigu 35 Lei kontra Violénsia Doméstika.

Iha julgamentu ne'e tribunál deskobre katak arguidu provadu komete krime ne'ebé Ministériu Públiku akuza hasoru arguidu.

Tribunál konklui prosesu ne'e no kondena arguidu ho pena multa dollar \$ 90.00 no sei selu durante loron 90 nia laran. Tribunál mos fiksa pena alternativa loron 60 ba arguidu kuandu arguidu la kompri pena multa ne'e.

7. Kazu krime furtu agravadu no reseptasaun agravadu ho Nú. 202/Crm.C/2012/TDB

Kompozisaun tribunál : Koletivu
Juis : Dr. José Gonçalves, Dr. Afonso Carmona no Dra. Ângela F. Belo
Ministériu Públiku : Dr. Baltazar Ramos
Defeza : Dr. Cancio Xavier, Dr. Sergio P.D. Quintas, Dr. Rui M. Guterres, Dr. Gregório de Lima, Dr. Pedro Aparicio no Dr. Wilson Correia (Ekipa Advogadu husi Defensoria Públiku no Advogadu Privadu)
Konkluzau : Sei kontinua rona depoimentu testemuña seluk no rona alegasaun finál

Iha 13 Juñu 2013, Tribunál Distritál Baucau kontinua julgamentu hodi rona depoimentu husi testemuña nain 3 ba kazu furtu agravadu no krime reseptasaun agravadu ne'ebé involve husi arguidu AAG ho nia kolega sira nain 14 hasoru empreza BNU Baucau.

Testemuñasira GX, AO no AAP depoimenta katak sira la haree akontesementu, maibé iha 03 Janeiru 2012 sira tama servisu mak hatene/rona katak osan lakon iha kofre BNU nian.

Iha 20 Juñu 2013 tribunál kontinua rona depoimentu husi testemuña nain 4. Tuir testemuña DF no JJ depoimenta katak sira la hatene osan lakon iha BNU maibé sira rona depoisode akontesimentu ne'e.

Tuir testemuña MS haktuir ba tribunál katak nia la hare no la hatene kona-ba akontesimentu ne'e. Maibé nia deklarata katak nia halo konsorsiu ho arguidu EMQC hodi hala'o projeitu ida iha Baucau. Mesmu nune'e, osan husi projeitu ne'e BNU kansela tiha to'o agora no osan ne'e la transfer ba sira nia konta bankaria.

Tuir testemuña BXCB depoimenta katak arguidu AAG ba deve osan iha Caritas Baucau hamutuk US\$5.000.00 maibé osan ne'e, fó fila ona iha 03 Janeiru 2012, liu husi transferensia ba konta bankaria Caritas Baucau nian.

Rona tiha testemuña sira nia depoimentus, tribunál marka fali oráriu julgamentu foun ba iha 27 Juñu 2013 ho agenda kontinuasaun rona testemuña no alegasaun finál.

8. Kazu krime ofensa ba integridade física simples ho Nú. 193/Crm.S/2012/TDB

Kompozisaun tribunál: Singulár
Juis : Dr. José Gonçalves

Ministériu Públiku : Dr. Pascasio de Rosa Alves
Defeza : Dr. Rui Manuel Guterres
Konkluzau : Kondena ho pena multa US\$ 45.00

Iha 17 Juñu 2013 Tribunál Distritál Baucau hala'o audiénsia julgamentu ba kazu krime ofensa ba integridade fízika simples ho natureza violénsia doméstika. Kazu ne'e involve arguidu JM hasoru nia fen LP ne'ebé akontese iha 07 Agostu 2012, iha Dsitritu Viqueque.

Ministériu Públiku akuza arguidu kontra artigu 145 Kódigu Penál konaba ofensa ba integridade fízika simples konjuga ho artigu 35 Lei Kontra Violénsia Doméstika.

Iha julgamentu arguidu uza nia direitu nonok tuir artigu 60 Kódigu Prosesu Penál, maibé vítima deklara ba tribunál katak arguidu tuku dala 2 iha (vítima) nia hirus matan. Arguidu kontinua atu tuku dala rua iha (vítima) nia ulun maibé la kona. Vítima mos deklara katak arguidu la ameasa vítima no sira diak malu ona.

Iha alegasaun finál, Ministériu Públiku husu ba tribunál atu kondena arguidu ho pena prizaun fulan 5 no suspende ba iha tinan 1. Alegasaun ne'e bazeia ba konsiderasaun katak arguidu no vítima dame ona, arguidu foin primeiraves mai hatan iha tribunál no responsável ba família.

Defeza husu ba tribunál atu aplika pena ne'ebé kma'an ba arguidu tanbá arguidu diak malu ona ho vítima no responsabiliza ba família.

Rona tiha alegasaun final, tribunál marka ba iha 25 Juñu 2013 hodi rona leitura sentensa. Iha 25 Juñu 2013, tribunál konklui hodi kondena arguidu ho pena multa \$ 45.00 ne'ebé sei durante loron 90 nia laran. Kada loron ida ekivale ba sentavus \$. 0.50 no selu kusta judisial US\$10.00. Tribunál mós fiksa pena alternative loron 60 prizaun, kuandu arguidu la kompri pena multa ne'e.

9. Kazu krime propaganda eleitorál ilísita ho Nú. 140/Crm.S/2012/TDB

Kompozisaun tribunál : Singulár
Juis : Dra. Ângela Faria Belo
Ministériu Públiku : Dr. Pascasio de Rosa Alves
Defeza : Dr. Rui Manuel Guterres
Konkluzau : Adiadu

Iha 17 Juñu 2013 Tribunál Distritál Baucau adia julgamentu ba kazu krime propaganda eleitorál ilísita ba iha 22 Novembru 2013. Adiantu ne'e akontese tanba arguidu no testemuña ne'ebe notifikadu la marka prezensa iha tribunál hodi tuir julgamentu. Kazu ne'e akontese iha 06 Marsu 2012 iha Distritu Viqueque.

10. Kazu krime danu simples -Nú. 186/Crm.S/2012/TDB

Kompozisaun tribunál : Singulár
Juis : Dr. José Gonçalves
Ministériu Públiku : Dr. Pascasio de Rosa Alves
Defeza : Dr. Rui Manuel Guterres
Konkluzau : Rona deklarasaun arguidu, vítima no depoimentu testemuña

Iha 18 Juñu 2013 Tribunál Distritál Baucau hala'õ julgamentu ba kazu krime danu simples ne'ebé involve arguidu nain 3: AS, SS no JMS hasoru vítima OS. Kazu ne'e akontese iha 18 Abril 2012 iha Viqueque.

Ministériu Públiku akuza arguidu sira katak iha 18 Abril 2012, iha tuku 5.00 lokraik, arguidu sira hodi fatuk tuda rahun vítima nia kalen didin uma 2, bikan masa, sanan 2, tasu 1, balde 2 no kadeira masa/plástiku 2.

Kazu ne'e akontese tanba vítima nia karau tama iha arguidu sira nia natar no estraga arguidu sira nia hare.

Arguidu AS no JMS rezeita akuzasaun Ministériu Públiku no deklarata katak sira la involve iha akontesementu. AS no JMS deklarata katak sira to'õ iha fatin akontesementu depoisde kazu ne'e akontese tiha ona. Entertantu, arguidu SS deklarata katak nia mak tuda vítima nia uma dala 2, tanbá vítima nia karau tama iha arguidu nia natar, maibé polísia mai kaptura fali arguidu nia maun.

Vítima deklarata katak nia haree arguidu nain 3 ne'e ho ema lubuk ida mak halai sai husi vítima nia uma oin, wainhira vítima fila husi kesi kuda. Vítima mos deklarata tan katak motivu akontesimentu ba kazu ne'e tanbá vítima ho nia família hili kandidatu Taur Matan Ruak hanesan sira nia kandidatu ba Prezidente.

Iha depoimentu testemuña AdS ho OdS haktuir ba tribunál katak arguidu SS mak tuda dala rua ba iha vítima nia uma leten no arguidu JMS mak tebe rahun vítima nia kadera 1. Testemuña sira la hatene kona-ba involvimentu arguidu AS nian.

Depoisde rona tiha parte sira nia deklarasaun no depoimentu tribunál susupende audiénsia no marka fali ba iha 25 Juñu 2013.

Iha audensia ne'ebé halao iha 25 Juñu 2013, tribunál kontinua rona depomentu husi testemuña SPP. Iha testemuña SPP nia depoimentu haktuir katak arguidu SS mak tuda dala 2 ba iha vítima nia uma leten. SPP mos depoimenta katak nia mak ba satan netik atu arguidu atu la bele tuda tan. Maibé nia depoimentu katak nia la haree involvimentu arguidu AS no JMS iha kazu ne'e.

Iha alegasaun final, Ministériu Públiku husu ba tribunál atu aplika pena multa ba arguidu SS no JMS maibé absolve arguidu AS tanbá durante julgamentu la produs faktus ruma atu kondena nia.

Defeza husu ba tribunál atu aplika pena ne'ebé kma'an ba arguidu SS no JMS tanbá arguidu sira ne'e foin primeiraves hatan iha tribunál, no nu'udar estudante. Maibé husu ba tribunal atu absolve arguidu AS tanba laiha provas ruma ne'ebé hatudu arguidu AS involve iha kazu ne'e.

Depoisde alegasaun final, tribunál marka leitura sentensa ba iha 09 Jullu 2013 tuku 09:00.

11. Kazu krime inséndiu ho Nú. 159/Crm.C/2012/TDB

Kompozisaun tribunál : Koletivu
Juis : Dr. Afonso Carmona, Dr. José Gonçalves no Dra. Ângela Faria
Belo
Ministériu Públiku : Dr. Baltazar Ramos
Defeza : Dr. Gregório de Lima
Konkluzau : Rona arguidu, vítima no testemuña sira.

Iha 25 Juñu 2013 Tribunál Distritál Baucau hala'o julgamentu ba kazu krime inséndiu/sunu uma ne'ebé involve arguidu FMG hasoru vítima JCV no MCV. Kazu ne'e akontese iha 5 Agustu 2011, iha Sub-distritu Vemasse, Distritu Baucau.

Ministériu Públiku akuza katak iha 5 Agostu 2011, maisumenus tuku 8 kalan, arguidu hodi eskeru gas ida sunu vítima sira nia uma. Aktu ne'e rezulta ahi han uma 2 no sasan hotu iha uma laran la konsege salva no hamosu prejuizu ba vítima sira maisumenuz US\$5.000.00 resin.

Iha audensia julgamentu arguidu deklara katak akuzasaun Ministériu Públiku la los. Arguidu deklara katak momentu kazu ne'e akontese nia (halo nia servisu) iha Dili. Arguidu hatutan katak ne'e ema duun deit ba nia tanbá nia nu'udar membru PSHT no problema ne'e mosu wainhira iha konfrontasaun entre artemarsiais Persaudaraan Setia Hati Terate (PSHT) no Ikatan Kera Sakti (IKS).

Iha vítima MCV no testemuña JCF depoimenta katak sira la hatene se mak sunu sira nia uma maibé deklara katak ema sira ne'ebé sunu sira iha akontesimentu ne'e hatais hela farda metan PSHT nia.

Iha alegasaun final Ministériu Públiku nian, husu ba tribunál atu absolve arguidu husi kazu ne'e tanbá durante julgamentu, tribunál la produs faktus ruma hodi kondena arguidu.

Defeza mós apoia alegasaun Ministériu Públiku tanbá durante julgamentu la produs faktus atu kondena arguidu.

Depois rona tiha alegasaun husi parte sira, tribunál marka fali julgamentu ba 9 Jullu 2013, iha tuku 10. 00 dader-san hodi rona leitura akordaun.

12. Kazu krime ofensa ba integridade física simples - Nú. 143/Crm.S/2012/TDB

Kompozisaun tribunál: Singular
Juis : Dr. José Goncalves
Ministériu Públiku : Dr. Pascasio de Rosa Alves

Defeza : Dr. Gregório de Lima
Konkluzau : Adia julgamentu

Iha 25 Juñu 2013, Tribunál Distritál Baucau adia julgamentu ba kazu krime ofensa ba integridade fízika simples ho natureza violénsia doméstika ne'ebé tuir lolos atu julga iha loron ne'e. Kazu ne'e adia maibé tribunál la marka data fixu klaru tanbá tribunál seidauk hetan arguidu nia paradeiru.

13. Kazu krime ofensa ba integridade fízika simples ho Nú. 199/Crm.S/2012/TDB

Kompozisaun tribunál : Singulár
Juis : Dr. José Gonçalves
Ministériu Públiku : Dr. Baltazar Ramos
Defeza : Dr. Gregório de Lima
Konkluzau : Adia ba 9 Jullu 2013 hodi rona desizaun

Iha 25 Juñu 2013, Tribunál Distritál Baucau hala'o julgamentu ba kazu krime ofensa ba integridade fízika simples ho natureza violénsia doméstika. Kazu ne'e involve arguidu JBX hasoru nia fen JX. Kazu ne'e akontese iha 12 Novembru 2012, iha Distritu Baucau.

Ministeriu Públiku akuza katak iha 12 Novembru 2012, arguidu basa dala 2 iha vítima nia hasan no tebe dala ida iha vítima nia kabun. Kazu ne'e akontese tanbá arguidu deskonfia nia fen ba mane seluk.

Ministériu Públiku akuza arguidu kontra artigu 145 Kódigu Penál kona-ba ofensa ba integridade fízika simples konjuga ho artigu 35 Lei Kontra Violénsia Doméstika.

Iha julgamentu arguidu konfesa totalmente faktus ne'ebé Ministériu Públiku akuza ba nia no deklarara katak faktus sira ne'e los hotu.

Hafoin rona tiha deklarasaun arguidu, tribunál kontinua ba alegasaun final. Iha alegasaun final, Ministériu husu ba tribunál atu kondena arguidu ho pena prizaun fulan 3 no suspende ba tinan 1 tanbá arguidu konfesa faktus, arrepende nia hahalok no responsavel ba família.

Defeza husu ba tribunál atu absolve nia kliente tanbá arguidu konfesa, arrepende, dame malu ona no responsavel ba família.

Depois rona tiha alegasaun husi parte sira tribunal adia julgamentu ba iha 9 Jullu 2013, iha 9.00 dader hodi rona leitura sentensa.

14. Kazu krime ameasa-Nú. 196/Crm.S/2012/TDB

Kompozisaun tribunál : Singulár
Juis : Dr. José Gonçalves
Ministériu Públiku : Dr. Baltazar Ramos
Defeza : Dr. Gregório de Lima

Konkluziun : Omóloga liu husi tentativa konsiliaun

Iha 25 Juñu 2013 tribunál Distritál Baucau halo tentativa konsiliaun ba kazu ameasa ne'ebé involve arguidu Felisberto Ximenes hasoru vítima Epifania Sarmento no Francisco Feliciano Simões. Kazu ne'e akontese iha 1 Novembru 2011 iha Distritu Baucau.

Iha audensia tentativa konsiliaun ne'e, vítima sira ne'e prontu atu perdua arguidu nia hahalok maibé husu ba arguidu atu la bele repete tan nia hahalok iha futuru. Arguidu mos konkorda pedidu no kondisaun ne'e.

Konsidera katak parte sira tama ona iha akordu dame entre parte sira, tribunál omóloga no absolve arguidu husi kazu ne'e.

Atu hetan informasaun kle'an liután favór kontaktu:

Luis de Oliveira Sampaio

Diretór Ezekutivu JSMP

Diresaun e-mail: luis@jsmp.minihub.org

info@jsmp.minihub.org

Telefone: 3323883 | 77295795

Website: www.jsmp.tl

Facebook: www.facebook.com/timorleste.jsmp

Twitter: @JSMPtl